

Kurō Fesiya Od

Od Uyu Irouya

¹ Jesus Kristus nē kurō fesiya od, are ereb kaisā bagai wō youf anī, Negurem yogon ferfer ifelnēdiyouf nigin Jesus ifenen. Jesus ī, yogon ferfer Jon od anī keleī youf nigin, yogon engel Jon bun sur fen.

² Jonem ereb ereb ganan ī ilen anī kurō falaisif, are Negur nē od ado, Jesus Kristus nē od.

³ Taka ī profet od enei iwesef are ī el fiyek, agef fen, idi anī karī de fen, ereb anī bun itoton anī waud bun dinof anidi el fedif, ere nigin, sain mogo dodolef.

Jon Sios Sewen Bun Yogan Aanya Sur Fen

⁴ Aya Jon,

Asia provins bun sios sewen bun pas enei atotof.

Negur ī gama ibodok, kulu ibodon, dumen isiyouf bunem, uur sewen yogon king nē sia wagen difaref bunem ado,

⁵ Jesus Kristus ī Negur nē od el fe dōf wogō yedig, ī tamo gare den bun tamal uyulil kel turī fiyen, tenebur king ganan neid mudur ī bunem, wau ifenēyā ado wau inosiya ã bun isif.

Jesus ī ada nigin wau laaf fen, yogon naud bunem, ada neda mosor bun tamal yalelnadan.

⁶ Agef fen, ī ada yogon Tama Negur aruna yaleya nigin, in tano ado in pris inodan. ī bun

fula fiya medeīya ado megeir gai gai ibodkalauf!
Momoi.

⁷ Log, ĩ lalo bunem isif.

Age fe di, meleid ganan ĩ dilouf,
idi ĩ gilĩ difen anidig dilouf.

Age fe di, tamo kayau tenebur ein ganan ĩ
nigin waud gudũ fouf.

Are agef bagai wõ youf! Momoi.

⁸ Odug Negur irok, “Aya uyulil ado idikeleya,
aya gama abodok, kulu abodon, dumen asiyouf,
aya saa ilun nẽ kusĩ tamo guri afeid uyu aroudig
anĩ.”

Taka ĩ Tamo Naal Gen

⁹ Aya Jon, āgenei tureĩ, aya, Jesus bun darau,
Negur nẽ tano ado, feseya sã ifareya, ā geid
taledig, aya Negur nẽ od ado Jesus nẽ od wogõ aun
nigin, Patmos nuyo bun abodon.

¹⁰ Odug nẽ naa bun, aya Awa Uur namen abod
ken, aya dumeun ait odug taur gen wõ ye mog,
karĩ aun.

¹¹ Ait iron, “Ereb õ ulef anĩ, buk kori fiya
bun utot fen, sios sewen bun sur wediyouf, oun
Efesus, Smerna, Pergamum, Taiataira, Sardis,
Filadelfia ado, Laodisia.”

¹² Aya ait wogõ fiyan anĩ ileya nigin falei aun.
Aya falei aul fen, lam nẽ gol tutur sewen ailedin.

¹³ Lam tutur anĩ atun, aib taka “tamo naal
gen”* kolos meluk ifonũ di, yen isilen ado, let gol
akor gu fen anĩ ifaren.

¹⁴ In mudur ado fatiya, sipsip siwi lalau, saa lalo
lalau gen, yagon mala are yã mala fitotoleya gen.

* ^{1:13:} Daniel 7:13

15 Yogan ye are bras yā malan ifalegeya medeīya gen, in ait are naan uhuhuya gen.

16 Yogan ima biyalē barisa sewen iroun, agef fen, in awa bun tamal, dimig bala waila si sitakā wō yen. Yogan nawa are gaa ririya gen medeī yen.

17 Aya ī ail fen, aya ī ye gariyan kubū au, laa gen ainan. Age afe di, ī ima biyalē aya teteun ino fen, iron, “Õ to kumī wo. Aya gariya, aya idikeleya.

18 Aya mata ibodōya nē, aya laa fiyan, anī ere, uleyaf, aya gai gai mata abodkalauf! Aya laa nē ado Hades nē ki aroudif.

19 “Anī nigin, ereb õ ulen, ereb gama ibodok, ereb dumen wō youf anī utot.

20 Barisa sewen aya imau biyalē ulen ado, lam nē gol tutur sewen ulen anī nē waa nē gariya, are eig fiya: Barisa sewen are sios sewen neid engel, lam nē tutur sewen are sios sewen.

2

Efesus Sios Bun Od Ilef

1 “Efesus sios nē engel bun utot:

Od enei are, ī barisa sewen ima biyalē irou mog, sewen gol lam tutur difaren atun iyok ilen nē od:

2 Ereb õ ago wof, are aya keleī, ogon kabī totol yaleya ado ogon feseya sā ifareya anī. Aya keleī, õ tamo sesen to loloum weid fen, idi dogo anī aposel dedig, anī ere, aposel sā anidi es wiyeīd fen, idi neid idegēya anī ulen.

3 Õ totol ufar fen, neu yanau nigin morō faali won, anī ere, õ to fō yon.

4 Anĩ ere, aya õ nigin od enei ado: Ō uruwa aya nigin waũ laa fen anĩ utoron.

5 Anĩ nigin, õ nainenem kubũ won anĩ kisi wo! Falei wo fen, ereb uruwa agon anĩ agouf. Ō to falei wouf are, aya õ gein asi fen, ogon lam tutur ado yogon modoũ bun tamal alelauf.

6 Anĩ ere, toboununã biya enei õ ado: Ō Nikolas dõ difiyek neid toboununeid to oroyõdig, are ayag to oroudig.

7 Taka ĩ weder adouf, utornẽg len, ĩ Awa Uur sios irokenẽdif anĩ karĩ youf. Aib ĩ kusĩ anĩ wal fouf, aya ĩ mata ifenẽya nẽ aa Negur nẽ paradis bun ibodok anĩ bun tamal, yõya nigin yo afiyẽf.

Smerna Sios Bun Od Ilef

8 “Smerna sios nẽ engel bun utot:

Od enei are, ĩ gariya ado idikeleya, ĩ laaf fen, baban mata fã yen nẽ od.

9 Ogon darau ado ogon maleg nigin aya keleĩ, anĩ ere, õ safina musei ado. Aya idi dogo nigin Juda tamo dedig, anĩ ere, idi Juda tamo sã, Satan nẽ guru fiya anidi neid bou yûya od nigin keleĩ.

10 Ereb mogo õ darau ifonõf nigin to kumĩ wo. Aya õ arokonok, Satan ĩ mogo ã tunĩ kisi yeiÿa nigin kalabus bun ineneif. Age fe di, ã naa ten darau walogouf. Ō laa bun dinenõfeg, ogon momoiya urou kafĩ walauf, ago di, aya õ mata nẽ teter kurũ ayõf.

11 Taka ĩ weder adouf, utornẽg len, ĩ Awa Uur sios irokenẽdif anĩ karĩ youf. Aib ĩ kusĩ anĩ wal fouf, namba tu nẽ laa ĩ to daũ fiyẽf.

Pergamum Sios Bun Od Ilef

12 “Pergamum sios nē engel bun utot:

Od enei are, ī dimig bala waila si sitakā ado
nē od.

13 Ō ubodok nē an aya keleī, an Satan nē sia
ibodok. Anī ere, õ neu yanau urou kafī welef.
Antipas, neu dō fiya biya, aya nigin od wogō
yedig, ī Satan ibodok nē āgenei taun an dukesin
sain anī buneg, õ aya nigin ogon momooya to folō
welen.

14 Anī ere, aya õ nigin od tunī ado: Ō tamo
tunī an Balam nē keleī dirouf anidi ado, Balam
ī Balak ifelnē di, Balak ī Israel tamo kayau yeid
tū fiya nē meein ino fen, idegnēdi di, Israel
idi saaf idegēya waitou bun sesewi difen anī
dokon, noli toboununā dinon.

15 Age fiya gen, õ aneg tunī Nikolas nē
ifelnēya dirouf anidi ado.

16 Anī nigin, waū falei wo! Sāf are, aya kaisā
bagai õ gein asi fen, neu sigorou nē dimig ado idi
geid kusī auf.

17 Taka ī weder adouf, utornēg len, ī Awa Uur
sios irokenēdif anī karī youf. Aib ī kusī anī wal
fouf, aya ī mana iminēyan ibodok tunī afenēf.
Aya ī meein lalau takag, yana mata teten itoton
anī afenēf. Aib ī anī yalef dogol yana anī keleī
youf.

Taiataira Sios Bun Od Ilef

18 “Taiataira sios nē engel bun utot:

Od enei are Negur Naal nē od, yogon mala
are yā mala fitotoleya gen, yogon ye are bras
yā malan ifalegeya medeīya gen.

19 Aya keleĩ, õ ereb agof, ogon waũ laa fiya ado momoiya, ogon aruna yaleya ado feseya sã ifareya. Aya kelei, õ uruwa bun ago won anĩ wal fiya gama õ agodig.

20 Anĩ ere, aya õ nigin od enei ado: Õ kayau Jesebel, ï yogo nigin profet kayau yef anĩ, loloum wedig. Í yagon ifelnëya bunem neu ferfer idegnëdi di, idi noli toboununã bun dile fen, saaf idegëya waitou sesewi difen anĩ dödig.

21 Aya ï yagon mosor nigin wau falei youf nigin sain afenen, anĩ ere, ï to orof.

22 Anĩ nigin, aya ï darau nẽ fatar bun ara ken, idi ï geid seseirã dinodig anidi, kayau anĩ nẽ naab nigin waud to falei youf are, aya idi darau fatuk bagai afenëdiyouf.

23 Aya ï gere tar adenkesiyouf. Age afe di, sios ganan, aya waud ado kisi es afedig anĩ keleĩ youf. Age afe fen, aya ã mugu mugu ereb ereb ã ago gef kilei, mala solo afeneif.

24 Anĩ ere, aya ã tunĩ ganan Taiataira ufaregef anĩ arokeneik, ã kayau anĩ nẽ ifelnëya to uroug fen, Satan nẽ waa namen bagai dedig anĩ to kelein anĩ arokeneik (aya ã bun ereb morõ takat to afeneif).

25 Ereb ã urougef anĩ dogol urougef uleg mog, asiyouf.

26 Aib ï kusĩ anĩ wal fe fen, neu oroya dõf ile, idikeleya bun ouf, aya ï teneub lo fediya nigin megeir afenëf.

27 ‘I ain manig nem ulum irokenëdiyouf,
 ï mis gen daũ fedi di, urud falaisiyouf,’*

* **2:27:** Sam 2:9

are aya neu Dei bunem megeir alen gen.

²⁸ Aya ī bonimei nē barisa kilokilog afenēf.

²⁹ Taka ī weder adouf, utornēg len, ī Awa Uur sios irokenēdif anī karī youf.

3

Sardis Sios Bun Od Ilef

¹ “Sardis sios nē engel bun utot:

Od enei are, ī Negur nē uur sewen ado barisa sewen irouf anī nē od. Ō ereb agof, are aya keleī. Ō mata ubodok dedig, anī ere, õ laa yon.

² Fā wale! Ereb mogo laa fou fenē anī megeir wenē, ere nigin, aya õ ereb agof are neu Negur nē mala bun tutuk bagai sā ailef.

³ Anī nigin, ereb õ walen, ereb õ karī won anī karī walauf. Anī dō wo fen, waū falei wo. Ō to fā walouf are, aya bē tamo gen asiyouf. Aya sain nanī be, õ gein asiyouf anī, õ to keleī youf.

⁴ Anī ere, õ, Sardis an tamo kayau tunī, idi neid kolos amuyē fiya sā difaref anidi ado. Idi kolos lalau difoun ken, aya geid mayōf, ere nigin, idi kisi feleya bagai.

⁵ Aib ī kusī anī wal fouf, ī idi gen kolos lalau ifonūf. Aya yogon yana, mata ibodōyā nē buk bun tamal to alelauf, age afe fen, yogon yana neu Dei ado yogon engel meleid bun kurō afesiyouf.

⁶ Taka ī weder adouf, utornēg len, ī Awa Uur sios irokenēdif anī karī youf.

Filadelfia Sios Bun Od Ilef

⁷ “Filadelfia sios nē engel bun utot:

Od enei are, ī fateul bagai ado momoi nē od, ī Dawid nē ki irouf. Ereb ī kā fef, taka nem to inolalauf, agef fen, ereb ī inolelef, taka nem to kā falauf.

⁸ Ō ereb agof, are aya keleī. Ulef, aya, sukar kā feleya taka nem inoleleya kisi felya sā anī, õ wagen anon. Aya keleī, õ megeir naal bagai ado, anī ere, õ neu od dō wo fen, neu yanau to wa won.

⁹ Ulef, idi Satan nē guru fiya namen temeleid, idi dogo nigin Juda tamo dedig, anī ere, idi Juda tamo sā, idegēya tamo anī, ayam age afe di, idi disi, õ yē gariyan kubū de fen, aya õ nigin wau laa fedig anī idi keleī youf.

¹⁰ Ō feseya sā ufarauf nigin neu od urouf kafī welen anī nigin, ayag idi tenebur dibodok kisi fediya nigin teneub ganan bun darau isiyouf sain bun, aya õ ahaha ayōf.

¹¹ Aya kaisā bagai asiyouf. Ō ereb urouf anī kafī walauf, ago di, taka nem ogon kurū fiya nē teter anī to yalouf.

¹² Aib ī kusī anī wal fouf, aya, neu Negur nē tempel bun, ī monog tor atennēf. ī anī baban to bagai itorōf. Aya ī bun, neu Negur nē yana ado, neu Negur nē taun yana, Jerusalem mata, are saa ilun tamal neu Negur bunem isiyouf anī atotauf. Age afe fen, aya neu yanau matag ī bun atotauf.

¹³ Taka ī weder adouf, utornēg len, ī Awa Uur sios irokenēdif anī karī youf.

Laodisia Sios Bun Od Ilef

¹⁴ “Laodisia sios nē engel bun utot:

Od enei are Momoi Barikā nē od, ī dō fiya biya ado, momoi bagai Negur nē od wogō yedig, ī ereb ereb Negur inodin ganan nē gariya.

15 Ō ereb agof anī aya keleī, are õ medir sā, uruwag sā. Aya õ medir be, uruwa anī taka ubodok nigin orouf.

16 Anī nigin, õ laigog, medir sā, uruwag sā nigin, aya õ mogo awau bun tamal atigil arāyōf.

17 Ō urōdig, ‘Aya safina ganan kisi feleya, aya safina musei alen nigin, aya ereb taka to lau afedig,’ wodig. Anī ere, õ keleī sā, õ gai sane bagai, malalon ado, maleg, malā ifofakeleya ado, gemū ubodok.

18 Aya õ arokonok, õ aya bun gol bagai, gol yā bun difalegen anī, õ safina ganan kisi feleya bagai wō wouf nigin, na walouf, õ kolos lalaug ufonū di, ogon gemū mama dede wouf nigin na walouf, õ mala marasin malā bun uno fen, kelē walauf nigin na walouf.

19 Aya idi nigin wau laa fedig anidi, aya ou afeid fen, tai afedidig. Anī nigin, kabī totol wale fen, mosor utor ken, waū falei wouf.

20 Lo weleg, aya bobogē afar fen, godu afef. Taka ī aitou karī ye fen, sukar kā fouf are, aya ī namen asi fen, ī ado saaf māf, age afe di, ī aya ado saaf māf.

21 Aib ī kusī anī wal fouf, aya kusī wal afe fen, neu Dei nē king nē sia bun, neu Dei ado mabodok gen, īg neu king nē sia bun, aya ado mabodōf nigin yo afiyēf.

22 Taka ī weder adouf, utornēg len, ī Awa Uur sios irokenēdif anī karī youf.”

4

King nē Sia Saa Ilun Ibodok

¹ Anī bure fele di, aya kelē aulen, aya wageun an saa ilun nē sukar kā feleya ifar mog, ailen. Age afe fen, ait aya uyulil taur gen wogō fiya di, karī aun are iron, “Ein use, ago di, ereb enei bure fele di, wō youf anī, afelnōf.”

² Kaisā bagai aya Awa Uur namen abodon, age afe fen, wageun an saa ilun king nē sia bun, aib taka ibodon anī ailen.

³ Agef fen, taka an ibodon are, lo fiya bun meein medeīya jaspa ado meein giriya medeīya konilian gen wō yen. Walol taka, meein aaraau mata age fiya medeīya emeral gen sof fen, king nē sia anī kalilī fen.

⁴ King nē sia anī sirin, tuwenti-fo king nē sia anim salili de fen, tuwenti-fo mudur adodo anī bun dibodon. Idi kolos lalau difoun ken, dogo neid mudureid bun king nē gol teter ado dibodon.

⁵ King nē sia bun kolimei filiya firagagaū fe sof fen, gurūya odug wō ye di, kolimei gudū yen. King nē sia wagen lam sewen futu redin, are Negur nē awa uur sewen anī.

⁶ Takag, king nē sia wagen, ereb taka maaī gen galas nem dinon anī, galas medeīya bagai age fiya ibodon.

Anī atun king nē sia salili fiya bun, ereb mata ibodōya aiwa adodo difaren. Idi meleid barikā, wagedin ado dumedineg.

⁷ Ereb mata ibodōya uyu ifaren are laion gen, anī dō fiya are bulmakau gen, anī dō fiya are nawa, tamo nawa gen, anī dō fiya are webi fatutu yef gen.

⁸ Ereb mata ibodōya aiwa adodo idi mugu mugu wayeid sigis ado fen, bouweid ganan bun meleid barikā, wayeid farumēg meleid ado. Bō ado gaa ado, idi eig yeya to folō difeledig:

“Fateul, fateul, fateul
are Odug Negur saa ilun nē kusī tamo guri feid
uyu iroudig anī,

ĩ kulu ibodon, ĩ gama ibodok, ĩ dumen isiyouf.”

⁹ Ereb sain ereb mata ibodōya idi, tako ĩ king nē sia bun ibod ken, mata faimud ibodkeleya anī bun, fula fiya medeīya, yana odug ado, de fiyēya difenēdig bun,

¹⁰ mudur adodo tuwenti-fo, ĩ king nē sia bun ibod mog, ĩ wagen kuku de fen, ĩ mata faimud ibodkeleya anī seli dalesedig. Idi king nē sia wagen dogo neid teter gō difel fen, dirōdig:

¹¹ “Nemā Odug Negur,
õ fula fiya medeīya, yana odug ado, megeir yaleya
kisi feleya bagai,
ere nigin, õ ereb ereb ganan ago di, wowā den,
ago fen, ogon oroya bunem idi unodi di,
age de difaref.”

5

Buk Kori Fiya Ado Sipsip Naal

¹ Age de di, aya ĩ king nē sia bun ibodon anī ima biyalē, buk kori fiya si sitakā itotoya ado uris sewen nem ītā de fen, sile fiyan anī ailen.

² Age afe fen, aya engel megeir ado tako ailen, ĩ ait odugem iweig iron, “Aim uris eneidi narī feid fen, buk kori fiya enei fara feleya kisi feleya?”

³ Anī ere, saa ilun be, tenebur be, teneub farumen tamal, taka nem buk kori fiya anī fara feleya be, namen fele fiya kisi feleya sā.

⁴ Aya fatuk bagai inā alen, ere nigin, taka nem buk kori fiya anī fara feleya be, namen fele fiya kisi feleya to wō yen.

⁵ Age afe di, mudur adodo takam aya irokanaan, “To inā wale! Ulef, Juda nē ibor bun tamal Laion, Dawid nē Warei mogo kusī wal fen. Inim, sā buk kori fiya anī yagon ītāfiyā uris sewen ado fara falauf.”

⁶ Age ye di, aya Sipsip Naal dukesin anī gen, king nē sia ereb mata ibodōyā aiwa adodo salili difiyen ado, mudur adodo atun ifar mog, ailen. Ī karat sewen ado mala sewen ado, mala sewen are Negur nē awa uur sewen teneub ganan bun susur fedin anidi.

⁷ Sipsip Naal ī isi fen, ī king nē sia bun ibodon anī nē ima biyalē buk kori fiya anī yalen.

⁸ Sain ī anī yalen, ereb mata ibodōyā aiwa adodo, mudur adodo tuwenti-fo geid, Sipsip Naal wagen kuku den. Idi mugu mugu harp* ado beī gol nem kaau sumeī biya isokoseya ado guri difen, kaau sumeī biya are momoiya tamo kayau neid kosē.

⁹ Age dé fen, idi seg mata dalen:

“Õ buk kori fiya anī wale fen,
yagon ītāfiyā uris sewen anī fara feleya kisi
feleya bagai,
ere nigin, õ dinōkesi di,
õ ogon naud bunem

* **5:8:** Harp anī gitā gen musik kodē dedig.

ibor ganan bun, od fire fire ganan bun, tamo
 kayau ganan bun ado, teneub ganan bun,
 Negur nē tamo kayau na waledin.

¹⁰ Ō idi neda Negur aruna dalouf nigin, tano ado
 pris unenēdin,
 ago di, idi teneub ganan lo fiya nigin mudur
 dibodōf.”

¹¹ Age de di, aya malau ara ken, engel musei
 bagai neid aiteid karī aun, idi tausen musei ado
 handred tausen musei wal fiya. Idi king nē
 sia, ereb mata ibodōyā ado, mudur adodo salili
 difiyēdin.

¹² Age de fen, idi aiteid odugem seg dalen:
 “Sipsip Naal dukesin ī
 megeir, safina, kisi biya, totol, yana odug, fula fiya
 medeīyā ado,
 yana yaleseya yaleya kisi feleya bagai!”

¹³ Agef fen, aya, ereb ereb ganan saa ilun
 difaref, tenebur difaref, teneub farumen difaref
 ado, maaī bun difaref, ereb ereb ganan anī na-
 men mata difaref idi seg dale mog, karī aun:
 “ī king nē sia bun ibodok ado Sipsip Naal bun,
 yana yaleseya, yana odug, fula fiya medeīyā ado,
 megeir,
 gai gai ibodkalauf!”

¹⁴ Ereb mata ibodōyā aiwa adodo diron, “Mo-
 moi,” age de di, mudur adodo kuku de fen, yana
 dalesen.

¹ Aya lo afe mog, Sipsip Naal ītāfiya uris sewen anī uyulil fara fen. Age fe di, aya, ereb mata ibodōyā aiwa adodo takam, ait kolimei ait gen bun eig ye mog, karī aun, “Usi!”

² Aya lo afen, aya wageun an hos lalau taka ifaren. Tamo anī teten ibodon ī wi taka iroun, ī kusī wal fiya nē teter ifenen, age fe di, ī hos bun kusī wal fe fen, kusī wal fediyouf nigin ilen.

³ Sipsip Naal ītāfiya uris uyulil dō fiya anī fara fen, age fe di, aya ereb mata ibodōyā uyulil dō fiya anī eig ye mog, karī aun, “Usi!”

⁴ Age ye di, hos taka isin, are giriya bagai. Tamo anī teten ibodon ī, tenebur tamal malol yalel fen, tamo abob didenkesiyouf nigin megeir ifenen. ī anī dimig odug ifenen.

⁵ Sipsip Naal ītāfiya uris anī dō fiya fara fen, age fe di, aya ereb mata ibodōyā anī dō fiya anī eig ye mog, karī aun, “Usi!” Aya lo afen, aya wageun an hos karos taka ifaren. Tamo anī teten ibodon, yogon ima bun ī foi fiya nē safina iroun.

⁶ Age fe di, aya ereb mata ibodōyā aiwa adodo atun ait taka gen karī aun are iron, “Naa tekelei nē mala solo wit bret tekelei yalouf, naa tekelei nē mala solo baali bret towo yalouf. Ago fen, oliv moul ado wain to daū wo!”

⁷ Sipsip Naal ītāfiya uris anī dō fiya fara fen, age fe di, aya ereb mata ibodōyā anī dō fiya anī eig ye mog, karī aun, “Usi!”

⁸ Aya lo afen, aya wageun an hos bailuya taka ifaren. Tamo anī teten ibodon ī yana Laa, age fe di, Hades ī degē degē fiyen. Idi tenebur tamo kayau aiwa adodo foi fiya atun taka anī, dimig nem, kadir nem, dagi odug nem ado,

tenebur gaar kuñ nem didenkesiyouf nigin megeir ifenēdin.

⁹ Sipsip Naal ī ītāfiya uris anī dō fiya fara fen, age fe di, aya idi Negur nē od dale fen, feseya sā od anī wogō de di, didenkesin anidi neid meleidkanon alta farumen ailedin.

¹⁰ Idi aiteid odugem diweig diron, “Ereb ereb ganan nē Odug, fateul fen momoi, ere sain bun bagai, õ tenebur tamo kayau es woid fen, idi amā didenakesin nigin mala solo wenēdiyouf?”

¹¹ Age de di, idi mugu mugu kolos lalau meluk ifenēdin, agef fen, idi naal sain meluk tari de mog, dogo neid kabī tureid tar ado momooya tamo kayau Negur igirnēdin ganan, idi age difedin gen didenkesiya kisi falauf nigin irokenēdin.

¹² Aya ī ītāfiya uris anī dō fiya fara fel mog, ailen. Age fe di, mimī odug wō yen. Gaa gugum kel fen, wau gudu fiya nē gabar meme siwi nem iwaya gen karos kelen. Ogō oditekei naud giriya gen falei felen.

¹³ Age fe di, saa ilun barisa tenebur kuku ren, are aa fig faat dobi yau totolem yoū fe di, kuku redig gen age fen.

¹⁴ Saa, pepa kori fiya gen iwaikelen, agef fen, arei ganan ado nuyo ganan, dogo neid modoū ditoraran.

¹⁵ Age fe di, tenebur nē king, tamo yeneid adodo, kusī mudur, safina musei adodo, megeir adodo ado, ferfer ganan ado tamo kaffi fiya sā bun difaref ganan, kuren ado arei nē sa atun diminanan.

¹⁶ Idi arei ado sa diweig dirokenēdin, “Teteman kubūg fen, ī king nē sia bun ibodok anī nawa

ado Sipsip Naal nẽ didi bun tamal unokolnamāg!

¹⁷ Ere nigin, idi neid didi nẽ naa odug mogo isin, anĩ nigin, aim ifareya kisi feleya?"

7

Israel Tamo Kayau 144,000 Bun Uris Dinon

¹ Anĩ bure fele di, aya engel aiwa adodo, teneub idikeleya uyu uyu aiwa adodo bun, difar fen, teneub uyu uyu aiwa adodo nẽ yau, yau takam teneub be, maaĩ be, aa taka bun to fū fouf nigin kafī difel mog, ailen.

² Age afe fen, aya engel taka mata ibodōya Negur nẽ ïtāfiya uris ado gaa iseyan ise mog, ailen. Í engel aiwa adodo teneub ado maaĩ daũ fiya nẽ megeir ifenēdin anidi, ait odugem iweig irokenēdin:

³ "Ã teneub be, maaĩ be, aa taka fau mog to daūg, amā neda Negur nẽ ferfer demeid bun ïtāfiya uris manol len."

⁴ Age ye di, aya idi ïtāfiya nẽ uris dinon anidi ganĩ anĩ karĩ aun, are 144,000 idi Israel ibor ganan bun temeleid.

⁵ Juda nẽ ibor bun tamal 12,000 are ïtāfiya uris dinon,

Ruben nẽ ibor bun tamal are 12,000,

Gad nẽ ibor bun tamal are 12,000,

⁶ Aser nẽ ibor bun tamal are 12,000,

Naftali nẽ ibor bun tamal are 12,000,

Manase nẽ ibor bun tamal are 12,000,

⁷ Simeon nẽ ibor bun tamal are 12,000,

Lewi nẽ ibor bun tamal are 12,000,

Isakar nẽ ibor bun tamal are 12,000,

⁸ Sebulun nẽ ibor bun tamal are 12,000,

Josef nē ibor bun tamal are 12,000,
Benjamin nē ibor bun tamal are 12,000.

Guru Fiya Mala Odug Kolos Lalau Meluk Difonundin

⁹ Anī bure fele di, aya lo afen, aya wageun an guru fiya mala odug bagai, taka nem iwesleya kisi feleya sā, idi teneub ganan bun, ibor ganan bun, tamo kayau ganan bun ado, od fire fire ganan bun temeleid, idi king nē sia wagen ado Sipsip Naal wagen difaren. Idi kolos lalau meluk difoun ken, pam boge anā boge gen anī imedim guri difen.

¹⁰ Age de fen, idi aiteid odugem diweig diron:
“Kel gei fiya are
neda Negur king nē sia bun ibodok ado
Sipsip Naal nē.”

¹¹ Engel ganan, king nē sia ado, mudur adodo ado, ereb mata ibodōya aiwa adodo salili dififeid difar fen, king nē sia wagen neweid lē kuku de fen, Negur yana dalesen.

¹² Idi diron:
“Momoi!
Yana yaleseya, fula fiya medeīya,
kisi biya, de fiyēya, yana odug,
megeir ado, totol are
neda Negur bun gai gai ibodkalauf.
Momoi!”

¹³ Age de di, mudur adodo takam aya to fiyan,
“Idi eneidi kolos lalau meluk difonun are nani-dim, idi nainenem disin?”

¹⁴ Aya ū arokenen, “Tamo biya, ū keleū.”
Age au di, ū irokakan, “Eneidi are darau, kafī fiya odug bun temeleid disin. Idi dogo neid kolos meluk Sipsip Naal naud nem kulo dife di, lalaun.

- 15** Anĩ nigin,
 “idi Negur nẽ king nẽ sia wagen difar fen,
 yogon tempel bun gaa ado bõ ganan aruna
 daledig.
 Age dife di, ĩ king nẽ sia bun ibodok anim yogon
 salafat biraraũ fe fen, kerũ fediyouf.
- 16** Idi baban to naũ fediyouf,
 to naan ail fediyouf.
 Gaam be, ereb uruwa adom,
 baban to isaññediyouf.
- 17** Ere nigin, Sipsip Naal king nẽ sia atun ifaref
 inim, dogo neid lo fiya tamo ibodõf.
 ĩ idi mata ibodõya nẽ naan warur bun gurif
 iroulediyouf.
 Age fe di, Negur ĩ idi meleid bun tamal maruid
 ganan waĩ falauf.”

8

Itãfiya Uris Namba Sewen Ado Aa Gaula Sumeiñ Biya Nẽ Gol Beiñ

1 Sain Sipsip Naal itãfiya uris namba sewen anĩ
 fara fele di, saa ilun hap aua age fiya karasã sã
 mutũ bagai yenен.

2 Age fe di, aya engel sewen Negur wagen
 difaren anidi, taur sewen ifeneid mog, ailen.

3 Engel taka ĩ, aa gaula sumeñ biya nẽ gol beiñ
 ado isi, alta bun ifaren. ĩ aa gaula sumeñ biya
 musei, momooya tamo kayau ganan neid kosẽ
 ado, king nẽ sia wagen gol alta bun sesewi fouf
 nigin difenen. **4** Aa gaula sumeñ biya nẽ kaau,
 momooya tamo kayau neid kosẽ ado, engel ima
 bun tamal Negur wagen iselen.

5 Agef fen, engel aa gaula sumeī biya nē beī yale, alta bun tamal yā ife fen, tenebur iran, age fe di, kolimei gudūya, gurūya odug, kolimei filiya ado, mimī wō yen.

Taur

6 Age fe di, engel sewen taur sewen ado, taur wese fiya nigin dodok difen.

7 Engel uyulil yagon taur wese fe di, uyē ais, yā naud ado bagu fen, isi di, tenebur iraran, age fe di, teneub tekelei faraf towo fiya gen anī taka adok isaikeleñ, aa ganan faraf towo fiya gen anī taka adok isaikeleñ, agef fen, fisir mata ganan isasaikeleñ.

8 Engel uyu wō yen anī dō fiya yagon taur wese fe di, ereb arei odug gen yā fitotoleya ado maaīwō iran. Maaī faraf towo fiya gen anī taka, naud falei felen,

9 maaīwō ereb ereb mata ibodōya faraf towo fiya gen anī taka gare den, agef fen, waag ganan faraf towo fiya gen anī taka daū felen.

10 Anī dō fiya engel taka yagon taur wese fe di, barisa odug yal gen kaur fen, saa ilunem, naan faraf towo fiya gen anī taka bun ado, naan warur anidi bun kubū yen.

11 Barisa anī nē yana Dirikeī. Naan faraf towo fiya gen anī taka dirikeī kele di, tamo kayau musei, naan dirikeī kelen anī bunem gare den.

12 Anī dō fiya engel taka yagon taur wese fe di, gaa faraf towo fiya gen anī taka, ogō faraf towo fiya gen anī taka ado, barisa faraf towo fiya gen anī taka yū di, idi ganan faraf towo fiya gen anī taka gugum kelen. Naa faraf towo fiya gen anī

taka lalan sa kelen, agef fen, bō faraf towo fiya gen anī takag age fen.

¹³ Aya lo afe mog, aya webi taka karī au mog, ilun fatutu ye fen, ait odugem iweig iron, “Malalon! Malalon! Malalon tenebur dibodok anidi bun, ere nigin, engel towog mogo taur ait wese difou fenē!”

9

¹ Engel anī dō fiya engel taka yogan taur wese fe di, aya barisa taka saa ilunem tenebur kubū yen anī ailen. Barisa are ku isil idīya sā nē ki anī ifenen.

² Í ku isil idīya sā anī kā fele di, kaau are yā odug kū fiya modoū bun tamal gen fā yen. Ku isil idīya sā bun tamal kaau anim, gaa ado saa gugum kelen.

³ Age fe di, kaau namen tamal, totobi tenebur wowā den, are idi neid megeir, tenebur ābei neid megeir gen ifenēdin.

⁴ Idi tenebur tamal fisir be, ereb aayū be, aa taka to daū difouf, anī ere, tamo kayau idi Negur nē uris demeid bun sā anidi dogol daū difediyouf nigin irokenēdin.

⁵ Idi tamo idenkesiya nē megeir to ifenēdin, anī ere, idi ogō faif bun darau dogol difenēdiyouf nigin megeir ifenēdin. Age fe di, idi neid darau arar, ābei tamo garū fe di, darau arar iledig gen.

⁶ Naa anidi bun tamo laa dimirēf, anī ere, to dilouf. Idi laa orodiyouf, anī ere, laa to gurug fediyouf.

⁷ Totobi are hos kusī bun ileya nē gegen. Idi neid mudureid bun, ereb gol teter gen kurū difedin, idi neid neweid tamo neweid gen.

⁸ Nedi fatiyeid kayau fatiyeid gen, agef fen, waileid are laion waila gen.

⁹ Nedi siot kapa are ain nē siot kapa gen, agef fen, idi neid wayeid furūya are hos musei ado karis kusī bun gududu de fen, gou redig gen. ¹⁰ Idi ibud ado waileid ābei neid gen, agef fen, idi ibud nem ogō faif bun tamo kayau darau difenēdiyouf nigin megeir adon.

¹¹ Idi uyu iroukenēdiya nē king ado, are ku isil idīya sā nē engel, in yana Hibru od nem are Abadon, Grik od nem are Apolian.*

¹² Morō odug uyulil anī bure felen, age fe di, morō odug uru are fau disif.

¹³ Engel namba sigis anī yogon taur wese fe di, aya ait taka gol alta Negur wagen ifaref anī nē karat aiwa adodo bunem wowā yeid mog, karī aun.

¹⁴ Ait are engel namba sigis taur ado anī iroke-nen, “Engel aiwa adodo Yufretis naan odug bun difofan anidi fara woidle.”

¹⁵ Age ye di, engel aiwa adodo are aua, naa, ogō, yar enei bun bagai, tamo teneub ganan bun fara fiya towo anī taka adok didenkesiyouf nigin, dodok fedin anī folō feledin.

¹⁶ Hos teten kusī bun ileya nē tamo anidi are 200 milion. Aya dogo neid namba karī aun.

¹⁷ Aya malau seleulā kurā fiya bun, hos adodo tamo hos tetedin dibodon anidi eig fiya ailedin:

* ^{9:11:} Abadon ado Apolian nē gariya, Daū Fiya Tamo.

Idi neid siot kapa are, yā giriya gen, maaī gegē gen ado, bailuya salfa gen. Hos mudureid are, laion mudureid gen, agef fen, idi eweid bunem yā, kaau ado, salfa wowā yen.

¹⁸ Tamō tenebur ganan faraf towo fiya gen anī taka ganan, sane towo anim, yā, kaau ado, salfa idi eweid bun wowā yen anim didenkesin.

¹⁹ Hos idi neid megeir are eweid bun ado ibud bun ibodon, ere nigin, idi neid ibud are gogour gen fen, mudureid anim tamō kayau darau difenēdidig.

²⁰ Tamō kayau tunī ganan, sane eneidim to didenkesin anidi, idi imedim dinon anī to ditor ken, waud to falei yen. Idi kaa sesen yeneid yaleseya to ditor ken, gol, silwa, bras, meein ado, aa nē idegēyā waitou, are lo fiya, karīyā be, iyōyā kisi felya sā anidi yaleseya itorōyā sā.

²¹ Idi tamō yukesiya, dogo neid idegēyā kosēyā, dogo neid nōlī toboununā be, dogo neid bē yaleya toboununā nagineg waud to falei yen.

10

Engel Ado Buk Kori Fiya Naal

¹ Anī bure fele di, aya engel megeir ado taka saa ilunem isi mog, ailen. Ī lalom silef fen, yogan mudur bun walol ado. In nawa gaa gen, agef fen, yogan ye are tor yā bobo reya gen.

² Ī buk kori fiya naal taka ima bun fara feleya iroun. Ī ye biyalē maaī bun iten ken, ye kilē teneub bun itenen.

³ Agef fen, ī laion ninirā ye gen ken, ait odugem iweig iron. Sain ī iwegin, kolimei gudūya sewen neid aiteid wogō den.

⁴ Kolimei gudūya sewen wogō de di, aya anī atotau fenē age afen, anī ere, aya ait taka saa ilunem eig ye mog, karī aun, “Ereb kolimei gudūya sewen wogō den anī bun ītāfiya uris uno fen, ò to utotauf.”

⁵ Age ye di, engel maaī bun ado teneub bun ifar mog ailen, are ima biyalē saa ilun yalesen.

⁶ Agef fen, engel ī, Negur gai gai mata ibodkelyea, saa ado ereb ereb ganan anī bun difaref, teneub ado ereb ereb ganan anī bun difaref, maaī ado ereb ereb ganan anī bun difaref inodin anī yana nem, wau kuturol fen, iron, “Foiya nē sain sā!

⁷ Anī ere, engel namba sewen anī yogon taur wese fouf naa bun, Negur nē waa, ī yogon ferfer profet irokenēdin kilei, agef wō ye kisi falauf.”

⁸ Anī bure fele di, ait saa ilunem aya irokana di, karī aun, are baban irokanan, “Ule, engel maaī ado teneub bun ifaref anī ima bun, buk kori fiya fara feleya irouf anī wale,” yen.

⁹ Age ye di, aya engel garan ele fen, buk kori fiya naal anī ifanauf nigin arokenen. ī aya irokanan, “Are wale wō wakas. Are ò namē bun dirikeī youf, anī ere, ò awā bun are nin te gen dan yōf.”

¹⁰ Aya buk kori fiya naal engel ima bun tamal ale on. Are neu awau bun nin te gen dan fiyan, anī ere, aya akalaisile di, nameun dirikeī fiyan.

¹¹ Age afe di, idi aya dirokanan, “Ö tamo kayau musei, teneub musei, od musei ado, king musei nigin, baban profet od wogō wouf.”

11

Od Megeir Fiya Nē Isennēya Tamo Uru

¹ Aya sisi fiya nē tibog gen werī takā ifana fen, irokanan, “Ule fen, Negur nē tempel ado alta sisi wo fen, Negur yana an ganim dalesedig anī uwes.

² Anī ere, tempel fofomala anī utor. Are to sisi wo, ere nigin, are haiden ifenēdin. Idi foti-tu ogō bun taun fateul anī lai difalauf.

³ Age dife di, aya neu od megeir fiya nē isennēya tamo uru megeir afenēdi di, idi 1,260 naa anidi bun wau gudū fiya nē gabar difoun ken, profet od kurō difesiyouf.”

⁴ Eneidi are oliv aa uru ado lam tutur uru, tenebur nē Odug wagen difaref.

⁵ Takam idi darau ifenēdiya nigin age fouf are, yā eweid bunem wō ye fen, idi neid kiwai tar oditekei yakur falauf. Aibem takā idi darau ifenēdiyou fenē age fouf, are agef laa fouf bagai.

⁶ Tamō eneidi saa katī feleya nē megeir ado nigin, idi profet od wogō douf sain, uyē to isiyouf, agef fen, idi naan falei fe di, naud wōya nigin megeir ado fen, ereb sain orodif kilei, idi ereb sane fire fire bunem teneub yūya nē megeir ado.

⁷ Idi Negur nē od kurō fesiya bure difele di, gaar kuī anī ku isil idīya sā bunem ulō yeis fen, idi geid kusī de, wal feid fen, idenkesiyouf.

⁸ Idi neid bouweid buru taun odug anī nē naabur yenēf, taun are yaab od bunem Sodom ado Isip dedig, an nedī Odugeg aa tetek bun dukesin.

⁹ Tamō kayau fire fire bun tamal, ibor fire fire bun tamal, od fire fire bun tamal ado, teneub fire

fire bun tamal, tamo kayau idi, naa towo ado naa taka atun bun, nedī bouweid buru dile fen, mumā difouf nigin to yo douf.

¹⁰ Tamō kayau tenebur dibodok anidi, idi nigin waud al fe di, sifa dino fen, idi abob safina ege luwa difenēf, ere nigin, profet uru eneidi, idi tenebur dibodok anidi darau difenēdin.

¹¹ Anī ere, naa towo ado naa taka atun anī bure fele di, mata neseya nē uur Negur bunem idi namedin ilen, age fe di, idi fafā de difaren. Age dife di, idi diledin are kumī tererē den.

¹² Anī bure fele di, idi saa ilunem ait odug eig ye irokeneid mog, karī den, “Ilun ein useg,” yen. Age ye di, idi neid kiwai lo difeid mog, idi lalo bunem saa ilun diselen.

¹³ Sain anī bun bagai, mimī odug wō ye di, taun anī bun ten tekelei adok daū felen. Sewen tausen tamo kayau mimī anim idenkesin. Age fe di, idi gareya sā are kumī tererē de fen, saa ilun nē Negur fula fiya medeīya difenen.

¹⁴ Morō odug uyu ilen anī dō fiya bure fele di, morō odug anī dō fiya mogo melsā bagai isiyou fenē.

Engel Taur Namba Sewen Anī Wese Fen

¹⁵ Engel namba sewen anī yogon taur wese fe di, saa ilun ait odug wowā ye fen, diron:

“Tenebur nē tano are, neda Odug ado yogon Kristus nē tano wō yen,

age fe di, ī gai gai lo fiya nigin anī nē mudur ibodōf.”

¹⁶ Age de di, tuwenti-fo mudur adodo, Negur wagēn dogo neid king nē sia bun dibodon wageidlē kuku de fen, Negur yana dales,

17 diron:

“Odug Negur saa ilun nẽ kusĩ tamo guri weid uyu
 uroudig anĩ,
 õ gama ubodok, kulu ubodon, amã õ de
 mayok,
 ere nigin, õ ogon megeir odug wale fen,
 lo fiya nigin king wõ won.

18 Teneub ganan waud sanen, anĩ ere, ogon didi
 mogo isin.

Tamo gare den anĩ es fediya sain mogo isin,
 ogon ferfer profet, ogon tamo kayau fateul
 ado,
 idi ogon yanã nigin anini den anidi nanaal ado
 odudug,
 mala solo ifenẽdiya sain mogo isin,
 idi teneub daũ difef anidi daũ fediya sain mogo
 isin.”

19 Anĩ bure fele di, Negur nẽ tempel saa ilun kã
 fele di, yogon tempel namen yogon bar itenẽya
 nẽ bogis wõ yen. Age fe di, kolimei filiya, gurũya
 odug, kolimei gudũya, mimĩ ado, uyẽ ais ado odug
 wõ yen.

12

Kayau Ado Gogour Odug

1 Uris odug fire bagai saa ilun wõ yen. Kayau
 taka gaa ifoun kel fen, yogon ye farumen ogolam
 ado, yogon mudur bun barisa tuwelf nẽ teter
 kurũ fen.

2 Í bou ado fen, kesu gõ fiya sain melsã di, darau
 nigin kaĩ yen.

3 Age fe di, uris takag saa ilun wõ yen. Gogour
 giriya odug bagai mudur sewen, karat ten ado,

teter sewen mudur sewen bun difaren ado wō yen.

⁴ Yogan ibum barisa fara fiya towo anī taka saa ilun waif, tenebur iraran. Gogour odug anī kayau kesu gō fiya sain melsā anī wagen ifaren, are ī yagon kesu gō falaisi di, itobouf nigin age fen.

⁵ Kayau kesu taka gō fen, are kesu monog, ī teneub ganan ain manig nem ulum iro-kenēdiyout. Age fe di, yagon kesu kaisā bagai gurar fe yale, Negur ado yagon king nē sia wagen irouselen.

⁶ Kayau, Negurem modoū dodok fenen nē gerere tuan iya ilen, an ī Negurem 1,260 naa kulatun fiyēf.

⁷ Agef fen, saa ilun kusī wō yen. Maikel yagon engel geid, gogour odug geid kusī den. Age fe di, gogour odug, yagon engel geid, abag idi geid kusī den.

⁸ Anī ere, gogour odug in engel geid, idi neid megeir kisi feleya sā, anī nigin, idi saa ilun nedī modoū ditoron.

⁹ Gogour odug bagai are dale diran, are gogour kulu tamal bagai, anī Devil be, Satan dedig, ī teneub ganan idegnēdidig. ī tenebur dale diraken, yagon engeleg ī geid diraran.

¹⁰ Age fe di, aya saa ilunem ait odug eig ye mog, karī aun:

“Gama neda Negur nē kel yaleya, megeir, tano ado,
yagon Kristus nē totol mogo isin.

Ere nigin, ī neda turada tar bouweid yūya od irōdig,

ĩ neda Negur wagen, gaa ado bõ, idi bouweid
 yũya od irõdig,
 are mogo dale diran.

11 Idi Sipsip Naal naud bunem ado,
 dogo neid Jesus nigin od wogõya bunem
 ĩ wal difiyen.

Idi dogo mata ibodõya nigin kisi fatuk to dale fen,
 laa uyu ditoron.

12 Anĩ nigin, saa ilun õ ado,
 an ufaregef ã, wauĩ kulĩ ye!

Anĩ ere, teneub ado maaĩ ã, meleilon ado,
 ere nigin, Satan mogo ã bun isilen!

Seye ĩ bun isokosef,
 ere nigin, ĩ keleĩ, yagon sain mogo modegef.”

13 Sain gogour odug ĩ tenebur diran anĩ ile fen,
 ĩ kayau kesu monog gõ fen anĩ iruf ilen.

14 Kayau are, gerere tuan modoũ ĩ nigin dodok
 fenen anĩ bun fatutu ye ilauf nigin, webi odug nẽ
 waye uru difenen, an kayau gogour odug anim to
 irounẽf nigin, yar towo ado yar taka atun, kayau
 anĩ kulantun difiyef.

15 Age fe di, gogour ĩ awa kurenem, naan odug
 gen, naan foulâ fen, are kayau anĩ wal fiye ken,
 kuwei bun yale irousilauf nigin age fen.

16 Anĩ ere, teneub kayau isenne ken, awa aã ye
 fen, gogour odug awa kurenem naan odug foulâ
 fen anĩ yakasin.

17 Age fe di, gogour odug kayau nigin fatuk
 bagai name fen, kayau nẽ ibor tar fau dibodok
 anidi ganan geid kusïya nigin ilen, idi Negur nẽ
 ĩtäfiya dõ de fen, Jesus nẽ biya od dirouf anidi.

13

¹ Agef fen, gogour odug maaĩ yerin ifaren.

Gaar Kuĩ Maaĩ Namenem Ulõ Yesin

Age fe di, aya gaar kuĩ taka maaĩ namenem ulõ yeis mog, ailien. Ì karat ten ado, mudur sewen ado fen, Ì yogon karat ten bun teter adodo fen, mudur ganan bun Negur kono fiya nẽ yana ado.

² Gaar kuĩ aya ailien are lepat* gen, anĩ ere, yogon ye are bea nẽ ye gegen, agef fen, awa laion nẽ gen. Gogour odug yogon megeir, yogon king nẽ sia ado, totol odug, gaar kuĩ ifenen. ³ Gaar kuĩ nẽ mudur taka are dũ di, laa fou fenẽ gen yenен, anĩ ere, dũ di, laa fou fenẽ gen yenен are baban biya len. Teneub ganan terẽ de fen, gaar kuĩ dõ difen.

⁴ Tamo idi gogour odug yana dalesen, ere nigin, Ì gaar kuĩ megeir ifenen. Age de fen, idi gaar kuĩ yana dales fen, diron, “Aim anĩ gaar kuĩ gen? Aim anĩ Ì ado kusĩ yalesauf?”

⁵ Gaar kuĩ Ì, yogo seli kulõ fiya nẽ od ado Negur nigin kono fiya nẽ od wogõ youf nigin sigor ifen ken, foti-tu ogõ bun kabĩ yalouf nigin megeir ifenen.

⁶ Gaar kuĩ Ì Negur kono fiyef nigin, Negur yana, Negur nẽ ibodõya modoõ ado, idi saa ilun dibodok anidi bun bou yüya od wogõ youf nigin awa kamen.

⁷ Gaar kuĩ Ì, Negur nẽ tamo kayau geid kusĩ de fen, idi wal fediyouf nigin megeir ifenen. Agef fen, Ì, ibor ganan, tamo kayau ganan, od fire fire

* ^{13:2:} Lepat are fus kuĩ odug gen.

ganan ado, teneub ganan nē mudur ibodōf nigin megeir ifenen.

⁸ Tenebur dibodok anidi ganan gaar kuī yana dalesauf, are idi, saa teneub ado kare fen sain bunem isi sain enei bun, idi yeneid Sipsip Naal dukesin anī nē mata ibodōya nē buk bun to itoton anidim age difouf.

⁹ Taka ī weder adouf, utornēg len, ī karī youf.

¹⁰ Taka ī kalabus bun ileya nigin igirnēf,
 ī kalabus bun ilauf.

Taka ī dimig nem dukesiyouf nigin igirnēf,
 dimig nem ī dukesiyouf.

Enei wō youf sain bun, Negur nē tamo kayau feseya sā totol difar fen, momoya kafī difel dirouwauf.

Gaar Kuī Teneb Bunem Ulō Yesen

¹¹ Anī bure fele di, gaar kuī taka teneburem ulō yeis mog, ailēn. ī sipsip naal gen karat uru ado, anī ere, ī gogour odug gen wogō yedig.

¹² ī gaar kuī uyulil ulō yesin anī lof mog, yogen megeir ganan yale fen, kabī yalen. Agef fen, ī, teneub ado idi tenebur difaref anidi ganan, gaar kuī uyulil ulō yesin, are dū di, laa fou fenē gen yenen anī baban biya len, ī yana dalesauf nigin nugo fedin.

¹³ Agef fen, ī uris memelik odug inodin, ī tamo kayau lo de mog, age fe di, yā saa ilunem tenebur isin anīg age fen.

¹⁴ ī gaar kuī uyulil ulō yesin anī lof mog, megeir yale fen, memelik inodin nigin, ī tenebur difaref anidi idegnēdin. ī, gaar kuī, are dimig nem dū di,

baban biya len anī yana dalesauf nigin, idi anī nē malakanon dinouf nigin irokenēdin.

¹⁵ Ī gaar kuī uyulil ulō yesin anī malakanon mata ifenēya nē megeir ifenen, anī bunem, malakanon are sā wogō yen, ī age fe di, idi malakanon anī yana yaleseya ditoron anidi ganan didenkesin.

¹⁶ Gaar kuī dumen ulō yesin are, tamo kayau ganan, nanaal ado odudug, safrina ado ado maleg, kafī fiya sā tamo ado ferfer, uris takā imeid biyalē be, demeid bun dalouf nigin nugo fedin.

¹⁷ Age fe di, aibem taka to na yale fen, to na sur fouf, ī gaar kuī nē uris adouf anī dogol, uris are gaar kuī nē yana be, yogo yana nē namba.

¹⁸ Kisi biya adouf are, enei keleī youf. Are taka ī karīya biya adouf, ī utornēg len, gaar kuī nē namba iwesauf, ere nigin, namba are tamo nē. In namba are 666.

14

Sipsip Naal Ado 144,000 Tamo

¹ Anī bure fele di, aya lo afen, aya wageun Sipsip Naal Saion Arei bun 144,000, yogon yana ado yogon tama nē yana demeid bun itotoyan anidi, ī geid difaren.

² Age afe fen, aya ait taka saa ilunem, naan fatuk wī ye fen, gou redig gen ado, kolimei gudūya odug gen karī aun. Ait aya karī aun are, harp kodēya tamo harp kodē dedig gen.

³ Age de fen, idi, king nē sia, ereb mata ibodōya aiwa adodo ado, mudur adodo wagedin seg mata dalen. Aibem taka seg anī keleīya kisi feleya sā,

144,000 idi tenebur tamal kel gei fedin anidim dogol.

⁴ Eneidi are kayau geid yen ken, amuyē inoya sā anidi, ere nigin, idi dogo nigin karētut bagai dibodon. Idi Sipsip Naal narib ile di, idi dō de diyōdig. Idi tamo ganan atun kel geif fen, faat uyulil yūya gen, Negur ado Sipsip Naal bun sesewi fedin.

⁵ Idi sigoredin idegēyā taka to wō yen, idi bouweid bun od taka sā.

Engel Towo

⁶ Anī bure fele di, aya engel taka ilun bagai fatutu ye mog, ailen. Ī idi tenebur dibodok anidi, are teneub ganan, ibor ganan, od fire fire ganan ado, tamo kayau ganan bun kurō fesiyouf nigin, mata ibodkeleya nē biya od ado ailen.

⁷ Ī ait odugem iron, “Negur anini wiyēg fen, ī fula fiya medeīya wenēg, ere nigin, yogon es fiya nē sain mogo isin. ī saa, teneub, maaī ado, naan warur inodin anī yana waleseg.”

⁸ Anī dō fiya engel takam dō fiye ken, iron, “ī kubū yen! Babilon Odug kubū yen, ī teneub ganan yogon seseirā tobonunā nē wain totol ifeneīd don.”

⁹ Anī dō fiya engel takam dō fiyeīd fen, ait odugem iron, “Taka ī gaar kuī ado yogon malakanon yana yales fen, yogon uris dama bun be, ima bun yalouf,

¹⁰ īg Negur nē didi nē wain yāf, are mogo totol adok yogon didi nē kap bun fi felen. ī engel fateul anidi ado Sipsip Naal meleid bun, salfa yā bobo reya bun darau yalouf.

11 Age fe di, dogo neid darau nē yākaau fā ye, gai gai agef ibodkalauf. Idi gaar kuī ado yogon malakanon yana dalesedig anidi be, aib taka yogon yana nē uris yalen ī, naa be bō, si inoya nē sain sā.”

12 Enei wō youf sain bun, Negur nē tamo kayau, idi Negur nē ītāfiya dō de fen, Jesus nigin momoiya dirou kafī difelef anidi, feseya sā megeir difarauf bagai.

13 Anī bure fele di, aya saa ilunem ait taka eig ye mog, karī aun, “Utot: Idi sain enei bunem ilauf ganan, Odug bun gare douf are el fediyouf.”

Awa Uurem irok, “Momoi, idi dogo neid kabī bun si dinouf, ere nigin, idi ereb age difen are ado dilauf.”

Tenebur Saaf Kusu Fiya Sain

14 Aya lo afen, aya wageun lalo lalau taka ado, lalo bun ibodon are ‘tamo naal gen,’* ī yogon mudur bun gol teter kurū fen, yogon ima bun dimig gunō waila ado irouf anī ailien.

15 Age fe di, engel taka tempel bunem isi fen, ī lalo bun ibodon anī ait odugem iweig irokenen, “Ogon dimig gunō waila ado wale fen, kokour wo, ere nigin, kokour fiya nē sain mogo isin, tenebur saaf kusu fiya nē are mogo mayol.”

16 Age ye di, lalo bun ibodon ī, yogon dimig gunō waila ado tenebur waī fe di, tenebur saaf kokour fen.

17 Engel taka, saa ilun oun tempel bunem isin, īg dimig gunō waila ado iroun.

* **14:14:** Daniel 7:13

¹⁸ Age fe di, engel takag, yā lo fedig anī alta bunem isi fen, ait odugem ī dimig gunō waila ado iroun anī iweig irokenen, “Ogon dimig gunō waila ado wale fen, tenebur tamal wain nē biya kuru wo, ere nigin, wain biya are mayol.” ¹⁹ Engel ī yogon dimig gunō waila ado anī tenebur waīf fen, wain biya kuru fen, agef fen, ī Negur nē didi nē wain asi fiya modoū odug bun iraran.

²⁰ Wain biya are, taun yerin wain asi fiya modoū bun asi difen, age dife di, naud wain asi fiya modoū bunem isin, are 300 kilomita meluk fen, wan ado hap mita ilun.

15

Engel Sewen Teneub Daū Fiya Nē Sesen Sewen Adodo

¹ Anī bure fele di, aya saa ilun uris odug taka fire bagai ailien. Are engel sewen, idikeleya nē teneub daū fiya nē sesen sewen adodo, are idi idikeleya nē, ere nigin, idi bunem Negur nē didi idikalauf.

² Age afe fen, aya ereb taka maaī galas nem dinon anī, yā ado bagu fiya gen ail fen, idi gaar kuī, yogon malakanon ado, yogon yana nē namba kusī bun wal difen anidi, maaī yerin difaren anī ailien. Idi Negurem harp ifenēdin anī guri de fen,

³ Negur nē ferfer, Moses nē seg ado, Sipsip Naal nē seg dalen:

“Odug Negur saa ilun nē kusī tamo guri weid uyu
urooudig anī,

ō agodig anī odug fen, mala yū yaleya.
Teneub ganan nē King,

ogon naab are madur fen, momoi bagai.

⁴ O Odug, aim anī ō to kumī yo ken,
 ō yanā bun fula fiya medeīyā to inouf?

Ere nigin, ō dogol fateul.

Ogon tobonunā biya madur bagai are yaor won
 nigin,
 teneub ganan disi fen,
ō wagen yanā dalesauf.”

⁵ Anī bure fele di, aya lo afe mog, saa ilun
oun tempel, Negur nē Od Kurō Fesiya nē Salafat
Fateul, are kā fen.

⁶ Tempel namenem, engel sewen idi teneub daū
fiya nē sesen sewen adodo anī ulō desin. Idi kolos
lalau amuyē sā, medeīyā difoun ken, idi akoreid
bun gol let gu difedin.

⁷ Age dife di, ereb mata ibodōyā aiwa adodo
takam, gol beī sewen Negur mata faimud ibodke-
leya nē didi isokoseya anī, engel sewen ifenēdin.

⁸ Age fe di, tempel are, Negur nē fula fiya
medeīyā ado yogon megeir nē kaau isokose di,
engel sewen neid teneub daū fiya nē sesen sewen
anī fau bure feleya sā mog, takā nem tempel
namen ileya kisi feleya sā.

16

Beī Sewen Negur Nē Didi Ado

¹ Anī bure fele di, aya ait odug taka tempel
bunem engel sewen irokeneīd fen, eig ye mog,
karī aun, “Uleg, beī sewen Negur nē didi adodo
anidi teneub bun fi weleg.”

² Engel uyulil ile fen, yogon beī teneub bun fi
fele di, guruma sane darau odug bagai anī, tamo

kayau gaar kuī nē uris ado fen, yogan malakanon yana dalesedig anidi bun, wowā yen.

³ Anī dō fiya engel taka, yogan beī maaī bun fi fele di, maaī anī laa tamo nē naud gen falei fen, age fe di, erek erek maaīwō mata dibodon ganan gare den.

⁴ Anī dō fiya engel taka, yogan beī, naan odudug ado naan warur anidi bun fi felen, age fe di, naud falei feledin.

⁵ Age fe di, aya engel naan lo fedig anī eig ye mog, karī aun:

“Ó gama ubodok, kulu ubodon, ó Fateul Bagai,
ó madur bagai,
ere nigin, ó mogo ago es won.

⁶ Idi ogon tamo kayau ado ogon profet didenkeis
fen, dogo neid naud fi difelen,
anī nigin, ó idi naud yōya nigin wenēdin, are
idi yōya kisin bagai wenēdin.”

⁷ Age ye di, aya alta eig ye mog, karī aun:
“Momoi, Odug Negur saa ilun nē kusī tamo guri
weid uyu uroudig anī,
ogon es fiya are, momoi fen madur bagai.”

⁸ Anī dō fiya engel taka, yogan beī gaa bun fi fele di, gaa tamo kayau yā nem ifalegnēdiyof nigin megeir ifenen.

⁹ Idi uruwa totol bagai bunem ifalegnēdi di, idi, Negur teneub daū fiya nē sesen eneidi lo fedidig anī, yana kono difen, age de fen, idi waud falei ye fen, Negur yana yaleseya ditoron.

¹⁰ Anī dō fiya engel taka, yogan beī gaar kuī nē king nē sia bun fi fele di, yogan tano gugum kelen. Tamo idi darau nigin baleid mū de fen,

11 dogo neid darau ado gurumeid nigin, saa ilun nē Negur kono difen. Anī ere, idi ereb sane age difen anī to ditor ken, waud to falei yen.

12 Anī dō fiya engel taka, yogon beī Yufretis naan odug bun fi fele di, naan are, gaa iseyan tamal king disiyouf nē naab dodok fiya nigin, gere kelen.

13 Anī bure fele di, aya kaa sesen towo felī gen, idi gogour odug awa kurem, gaar kuī awa kurem ado, idegēya profet awa kurem ulō deis mog, ailen.

14 Idi kaa sesen nē uur anidim memelik nē uris dino fen, idi teneub ganan nē king ganan bun dile fen, Negur saa ilun nē kusī tamo guri feid uyu iroudig anī nē naa odug bun, idi kusī bun guru difouf nigin gou difediyouf.

15 Jesus irok, “Lo welegei, aya bē tamo gen asiyouf! Taka ī mulaī yenēyā sa ken, yogon kolos sirin ado ibodok are, ī el fiyek, ere nigin, ī gemū to ile di, yogon mama to dilouf.”

16 Age de fen, idi king, Hibru od nem Amagedon dedig nē an guru difouf nigin gou difedin.

17 Anī dō fiya engel taka, yogon beī ilun owōbē fi fele di, tempel namenem king nē sia bunem ait odug wō ye fen, iron, “Gama mogo bure felef!”

18 Age fe di, kolimei filiya, gurūya odug, kolimei gudūyā ado, mimī odug wō yen. Tamo tenebur difar mog, mimī odug age fiya taka to wō yen, mimī are gai odug bagai.

19 Taun odug Babilon are faraf towo fen, agef fen, teneub ganan nē taun daū feledin. Negur ī

Babilon Odug nigin weder fokōf fen, kap yogon didi barikā nē wain isokosen anī ifenen.

²⁰ Nuyo ganan sa kele di, areig ilediya kisi feleya sā.

²¹ Saa ilunem uyē ais ado odug, teke tekelei 50 kilogram age fiya tamo bun kuku ren. Age fe di, idi uyē ais adam daū fedin nigin de fen, Negur kono difen, ere nigin, daū fiya are, gai sane bagai.

17

Kayau Gaar Kuī Teten Ibodon

¹ Engel sewen beī sewen adodo anī takam isi fen, aya irokanan, “Usi, aya kayau bouwa na sur fedig odug, ī naan musei teten ibodōdig anī nē kaffi fiya afelnōf.

² Tenebur nē king, ī geid seseirā toboununā dino di, tamo kayau tenebur difaref anidi, yogon seseirā toboununā nē wain bunem, idi meleid waī yen.”

³ Age ye fen, engel ī Awa Uur bunem aya gerere tuan yale irouleyan. An aya, kayau, gaar kuī giriya, bouwa bun kono fiya yeneid barikā, mudur sewen ado, karat ten anī teten ibod mog, ailien.

⁴ Kayau ī, kolos giriya tu releya medeīya ado giriya bagai ifoun ken, gol, meein meli bagai ado, maaī tuwa meli bagai pel naki yen. ī gol kap, ninir safineid ado yogon seseirā toboununā nē sisik isokosen anī imam iroun.

⁵ Waa nē yana are, yogon dama bun ditoton:

BABILON ODUG

KAYAU BOUWEID NA SUR FIYA ADO
TENEBUR NINIR IBODOK ANIDI NEID SINA.

6 Aya, kayau, Negur nē tamo kayau neid naudeid ado, idi Jesus nē od kurō difesin anidi, nedī naudeid yokon, mala waī ye mog, ailēn.

Aya kayau anī ail fen, fatuk bagai terē aun.

7 Age afe di, engel aya irokanan, “Õ ere nigin terē wof? Aya, õ, kayau nē waa ado, gaar kuī kayau anī teten ibodōdig, ī mudur sewen ado fen, karat ten ado anī nē waa anī faded ayōf.

8 Gaar kuī ulen are, kulu ibodon, gama ibodōyā sā, agef fen, ī ku isil idīyā sā bunem ulō yeis fen, yogo daū falauf bun ilauf. Tamo kayau tenebur dibodok anidi, saa teneub ado kare fen sain bunem isin, idi yeneid mata ibodōyā nē buk bun to itoton, idi gaar kuī anī dile fen terē douf, ere nigin, gaar kuī ī kulu ibodon, gama ibodōyā sā, agef fen, fau dum isiyouf.

9 “Enei keleīyā nigin, kisi biya adouf. Mudur sewen are, arei mudu sewen kayau teten ibodōdig anī.

10 Idig king sewen anidi. Faif idi kuku ralaisin, taka fau ibodok, taka fau isiya sā. Anī ere, ī isiyouf are, sain naal bagai ibodōf.

11 Gaar kuī kulu ibodon, gama ibodōyā sā, are ī namba eit king, ī sewen anidi nē taka, ī yogo daū fiya bun ilauf.

12 “Karat ten õ ulen are, ten king idi tano fau yaleya sā anidi, anī ere, idi gaar kuī geid, aua tekelei king nē megeir dalouf.

13 Idi kisi tekelei ado fen, dogo neid megeir ado totol, gaar kuī difenēf.

14 Idi Sipsip Naal geid kusī douf, anī ere, Sipsip Naal idi kusī bun wal fediyouf, ere nigin, ī odug

neid Odug ado king neid King. Idi ī iweignēdin anī, igirnēdin anī, feseya sā dō difen anidi, ī geid difarauf.

¹⁵ Age ye fen, engel aya irokanaan, “Naan, kayau bouwa na sur fedig ī anī teten ibodon, õ ulen are, tamo kayau, guru fiya odug, teneub ganan ado, od fire fire ganan.

¹⁶ Karat ten õ ulen ado gaar kuī, idi kayau bouwa na sur fedig anī to orodiyouf. Idi ī daū difiye ken, gemū dinenēf. Idi ī bouwa dokon, yā nem tō difiyēf.

¹⁷ Negur idi neid waud bun kisi anī ino di, idi Negur nē oroya dō difouf nigin, idi kisi tekelei dino fen, dogo neid tano gaar kuī difenēf, age difef dile mog, Negur nē od kisi falauf.

¹⁸ Kayau õ ulen are, taun odug, tenebur nē king neid mudur ibodok anī.”

18

Babilon Narī Fen

¹ Anī bure fele di, aya engel taka saa ilunem isi mog, ailen. ī megeir odug ado, age fe di, yogan fula fiya medeīya anim teneub lalan len.

² ī ait odugem, totol bagai iweig iron:
“Kubū yen! Babilon Odug kubū yen!

ī, kaa sesen neid fō,
kaa sesen ganan neid fō ado,
ninā amuyē ado ninir sane to ile oroya ganan
neid fō falei fen.

³ Teneub ganan,
yogan seseirā toboununā nē wain totol don.
Tenebur nē king, ī geid seseirā toboununā dinon,

age fe di, tenebur nē bisnis tamo idi, yogon safina nigin oroya totol ado bunem, safina musei dalen.”

⁴ Anī bure fele di, aya ait taka saa ilunem eig ye mog, karī aun:

“Neu tamo kayau, ã yogon mosor anī utin to walogouf nigin ado,
 ã in mala solo sane taka to walogouf nigin,
 ã ī utornēg fen, usig,

⁵ ere nigin, yogon mosor mogo mudu ilun isel saa ilune di,
 Negur yogon idododin nigin weder fokō yen.

⁶ Ī ifenein kilei abag wenēgouf,
 ereb ī age fen are, ī age fen anī ado, taka teten unog fen, wenēgouf.
 Ereb ī yogon kap bun falei fen are, ī falei fen anī ado, taka falei ge fen, teten unogouf.

⁷ Ī fula fiya medeīya ado safina meli meli, yogo nigin yalen kilei,
 darau ado wau gudū fiya fatuk bagai wenēgouf.

Ī yogon wau bun, yogo yana yales fen,
 ‘Aya kuin abodok, aya waab sā,
 agef fen, aya to bagai wau gudū fouf,’ yen.

⁸ Anī nigin, naa taka bun, in daū fiyēyā nē sesen ī bun isiyouf,
 are laa, wau gudū fiya ado, kadir.

Agef fen, ī yā bun isaikalauf,
 ere nigin, Odug Negur ī es fiyek, ī anī megeir barikā.

⁹ “Tenebur nē king idi, ī geid seseirā tobonunā dino fen, yogon safina meli meli foi difen anidi, ī

isaĩ di, kaau dile fen, idi ũ nigin waud gudūf fen,
inã logurouf.

¹⁰ Idi in darau yaleya anĩ nigin fatuk bagai kumĩ
de fen, gerõ difar fen, dirõf:

“ Malalon! Malalon, O taun odug,
O Babilon, taun megeir ado!

Aua tekelei bun, ogon daũ fiya mogo isin!’

¹¹ “Tenebur nẽ bisnis tamo idi ũ nigin waud
gudūf fen, inã logurouf, ere nigin, takā nem idi
neid safina baban to na yalouf,

¹² safina are, gol, silwa, meein meli meli ado,
maaĩ tuwa meli bagai pel; gabar lalau medeïya,
gabar giriya tu releya medeïya, gabar slika ado,
gabar giriya bagai; aa meli meli fire fire; erek
erek fire fire elefan karat nem, aa meli meli nem,
bras nem, ain nem ado, mambol nem dinodin;

¹³ sinamon, ye, aa gaula sumeĩ nigin tõ fiyadig,
moul aa bun tamal sumeĩ biya biya ado, moul
biya takag; wain ado oliv moul; flawa ado wit,
bulmakau ado sipsip; hos ado karis, ferfer ado
tamo mata dibodok.

¹⁴ “Idi dirõf, ‘Ereb erek yaleya nigin õ oroyon
are, mogo sa kelen. Ogon safina musei ado erek
erek fula fiya medeïya ganan, mogo sa kelen, idi
baban to bagai fotou difouf.’

¹⁵ Bisnis tamo safina eneidi na sur dife fen, ũ
bunem safina musei dalen anidi, yogon darau
nigin fatuk bagai kumĩ de fen, gerõ difarauf. Idi
inã logur fen, waud gudūf fen,

¹⁶ diweig dirõf:

“ Malalon! Malalon, O taun odug,
kolos lalau meli bagai, giriya tu releya
medeïya ado, giriya bagai ifoun ken,

gol, meein meli bagai ado, maaī tuwa meli
bagai pel naki yen!

¹⁷ Aua tekelei bun dogol, safina odug bagai age
fiya daū felen!

“Maaī bun ulum irouya tamo ganan, idi waag
bun diyōdig ganan ado, idi maaī bunem dogo neid
mata ibodōya nē safina daledig anidi ganan, gerō
bagai difarauf.

¹⁸ Sain idi ī isaī di, kaau dile fen, idi diweig
dirōf, ‘Taun odug eig fiya taka tau ibodon?’

¹⁹ Idi aas mudureid bun digu ken, waud gudū
fe di, inā logur fen, diweig dirōf:

“‘Malalon! Malalon, O taun odug,
an idi maaī bun waag adon ganan,
yogon safina odug bunem safina musei
dalen!

Aua tekelei bun, are daū felen!

²⁰ O saa ilun, ī nigin waū kulī ye!

Negur nē tamo kayau, aposel ado, profet,
wauī kulīg!

Ī ā age yein kilei, Negur ī es fiyen.’ ”

²¹ Age ye fen, engel megeir ado, meein odug wit
itutuya nē age fiya, yale fen, maaīwō ira ken, iron:

“Waila sane eig fiya bunem,

Babilon taun odug agef daū fe di,
baban to bagai dilouf.

²² Harp kodēya tamo, seg tamo, kelel fīya tamo
ado, taur fūya tamo,

idi neid ailō õ bun baban to bagai karī douf.

Kabī fire fire ganan nē keleī tamo,

õ bun baban taka to bagai wō youf.

Wit itutuya nē meein ait,

õ bun baban to bagai karī douf.

²³ Lam nē lalan õ bun baban to bagai so fouf.

Tamo kayau yalef yalef yeya ait,
õ bun baban to bagai wō youf.

Ogon bisnis tamo idi, teneub ganan nē tamo odug.

Õ ogon idegēya kosē bunem, teneub ganan
udegnēdin.

²⁴ Profet, Negur nē tamo kayau ado,
tenebur ein didenkesin anidi ganan neid
naudeid, ī bun dilen.”

19

Halleluya!

¹ Anī bure fele di, aya saa ilun tamo kayau guru
fiya mala odug neid aiteid gou reya gen, karī aun:
“Halleluya!

Kel gei fiya, fula fiya medeīya ado, megeir are,
neda Negur nē.

² Yagon es fiya are, momoi fen madur bagai.

Ĩ kayau bouwa na sur fedig odug,

ĩ yagon seseirā toboununā bunem teneub daū
fen anī, es fiyen.

Ĩ yagon ferfer neid naudeid, anī mala solo ī bun
ifenen.”

³ Idi baban diweig diron:

“Halleluya!

Ĩ bunem kaau faimud gai gai iselauf.”

⁴ Mudur adodo tuwenti-fo ado, ereb mata
ibodōya aiwa adodo, kuku de fen, Negur king nē
sia bun ibodon anī yana dalesen. Age de fen, idi
diweig diron:

“Momoi, Halleluya!”

5 Age dife di, ait taka, king nẽ sia bunem wō ye fen, iron:

“Ā in ferfer ganan,
 ĩ anini wiyēgedig,
nanaal ado odudug,
 neda Negur yana waleseg!”

6 Age ye di, aya guru fiya mala odug aiteid gen karī aun, are naan fatuk wī ye fen, gou redig gen ado, kolimei gudūya odug gen, diweig dirō mog, karī aun:

“Halleluya!

Ere nigin, neda Odug Negur saa ilun nẽ kusī
 tamo guri feid uyu iroudig anī, ĩ lo fiya
nigin king ibodok.

7 Ada wauda kulī ye, wauda al fe fen,
 fula fiya medeīya tafenēf!

Ere nigin, Sipsip Naal kayau yaleya nẽ naa mogo
 isin,
age fe di, yagon kayau mois mogo yogo nigin
 dodok fen.

8 Kolos lalau meli bagai, medeīya ado filiya,
 ĩ ifonūf nigin ifenen.”

(Kolos lalau meli bagai are, Negur nẽ tamo kayau
neid tobonuneid madur anī.)

9 Anī bure fele di, engel aya irokanan, “Utot: ‘Idi
Sipsip Naal kayau mois ado bagu fiya nẽ sifa bun
ibodōya nigin iweignēdin are, idi el fedif!’ ” Age ye
fen, ĩ tobol fe iron, “Enei are, Negur nẽ od momoi
bagai.”

10 Age fe di, aya ĩ yana alesauf nigin, ye gariyan
kubū aun. Anī ere, ĩ aya irokanan, “To ago! Aya,
õ ado, ogon turā tar idi Jesus nẽ wogōya kafī
difel dirouf anidi geid, ada in ferfer. Negur yana

wales! Ere nigin, Jesus nigin wogōyā are, profet od wogōyā nē uur anī.”

Tamo Hos Lalau Teten Ibodon

¹¹ Aya saa ilun kā feleya ifar mog, aya wageun an hos lalau ifar mog, ailen. Tamō anī teten ibodon are, yana ‘Feseya Sā Dō Fiya Biya’ ado ‘Momoi Bagai’ dedig. Madur bagai bunem, ī es feid fen, kusī yedig.

¹² Yogan mala are, yā mala fitotoleya gen, agef fen, yogan mudur bun teter musei biya. ī yogo bun yana itotoya taka ado, are aibem taka to keleī, ī yogo dogol.

¹³ ī kolos meluk naud bun nu fen anī ifonun. Yogan yana are, Negur nē Od.

¹⁴ Saa ilun nē kusī tamō, idi hos lalau tetedin dibodada ken, kolos meli bagai, lalau filiya difoun ken, ī dō difiyen.

¹⁵ ī yogan awa bunem, dimig waila ado, teneub ganan yūf nigin wō yen. “ī ain manig nem ulum iroukenēdiyof.”* ī, Negur saa ilun nē kusī tamō guri feid uyu iroudig anī nē didi totol nē wain asi fiya modoū bun, asi fouf.

¹⁶ ī, yogan kolos meluk bun ado yogan tukuri bun, yana enei itotoya ibodok:

KING NEID KING ADO ODUG NEID ODUG.

¹⁷ Age afe fen, aya engel taka gaa bun ifar mog, ailen, ī ait odugem ninā ganan ilun fatutu def anidi iweig irokenēdin, “Usig, Negur nē sifa odug bun gurug,

¹⁸ agog fen, ã, king bouweid, kusī mudur bouweid, tamō megeir adodo neid bouweid, hos

* **19:15:** Sam 2:9

ado hos tetedin dibodadak anidi neid bouweid, tamo kayau ganan, kafī fiya sā tamo ado ferfer, nanaal ado odudug, bouweid wāgauf.”

¹⁹ Anī bure fele di, aya, gaar kuī, tenebur nē king ado, dogo neid kusī tamo idī, tamo hos teten ibodon anī, yogon kusī tamo geid weim kusī douf nigin, guru de mog, ailedin.

²⁰ Anī ere, gaar kuī are dale diroun, age de fen, idegēya profet, ī memelik nē uris gaar kuī mala bun inodin anīg, gaar kuī ado dale diroun. Uris anidi bunem, ī, idi gaar kuī nē uris dalen anidi ado, idi yogon malakanon yana dalesedig anidi idegnēdin. Idi urom mata dibod mog, ku kolili fiya meein salfa yā bobo reya barikā ado bun, gei de diraran.

²¹ Dogo neid kusī tamo ganan, dimig, tamo hos teten ibodon awa bunem wō yen anim, idenkesin, age fe di, ninā ganan idi neid bouweid dō dō, teid isokosen.

20

Tausen Yar

¹ Anī bure fele di, aya engel takā saa ilunem, ī ku isil idīya sā nē ki ado, sen odug imam irou fen, isi mog, ailen.

² ī gogour odug, gogour kulu tamal bagai, are Devil be Satan dedig anī yale fen, tausen yar ifarauf nigin sen nem ifokelen.

³ ī ku isil idīya sā bun ira ken, ku katī fel fen, anī teten ītāfiya uris inon. ī tenebur tamo kayau to idegneid mog, tausen yar ilauf nigin age fen. Anī bure fele di, sain tobega dogol ī folō fiyekalauf.

⁴ Aya, king nē sia anidi bun, idi es fiya nē megeir ifenēdin anidi dibod mog, ailedin. Age afe fen, aya, dogo neid biya od Jesus nigin wogō den ado, Negur nē od nigin, uleid kokour difedin anidi neid meleidkanon ailen. Idi gaar kuī be, yogon malakanon yana to dales fen, yogon uris demeid bun be, imeid bun to dalen. Idi mata ke de, fā de fen, Kristus geid, lo fiya nigin tausen yar ilauf anī nē mudur dibodon.

⁵ (Tamo gare den tunī ganan to ke de, fā de mog, tausen yar are bure felen.) Enei are, kel fāyā uyulil anī.

⁶ Idi kel fāyā uyulil anī bun ke de, fā den are, idi el feid fen, fateul. Laa uyulil anī dō fiya isif are, idi bun megeir sā. Anī ere, idi Negur nē ado Kristus nē pris dibod ken, tausen yar anī bun, Kristus geid, lo fiya nigin mudur dibodōf.

Satan Daū Felen

⁷ Tausen yar anī bure fele di, Satan ī yogon kalabus bun tamal yalelnē di,

⁸ ī tamo kayau teneub ganan bun idegnēdiyouf nigin, teneub idīyan aiwa adodo, are Gog ado Magog bun ile fen, idi kusī bun ileya nigin gou fediyouf. Idi neid namba are, maaī ubun mumul ifaref age fiya.

⁹ Idi teneub modoū odug bun dile fen, Negur nē tamo kayau neid modoū ado, taun Negur anī nigin wau laa fedig anī salili difen. Anī ere, yā saa ilunem isi fen, idi yakur feidlen.

¹⁰ Age fe di, Satan idi idegnēdin are, ku kolili fiya meein salfa yā bobo reya ado bun dale diran, gaar kuī ado idegēyā profet idi ketem mogo an

diraran. Idi ganan an sain ganan, bō ado gaa ado, gai gai darau dalouf.

Gare Den Anidi Es Fediyouf

¹¹ Anī bure fele di, aya king nē sia lalau odug ado, taka anī teten ibodon anī ailen. Teneub ado saa, ī mala iran nē waïf yale di, idi modoū san.

¹² Age fe di, aya, gare den anidi, odudug ado nanaal, sia wagen difaren ado, buk ikoudiya anidig ailedin. Buk takag ikouya ailen are, mata ibodōya nē buk. Gare den anidi, ereb age difen buk bun itoton anī kilei, es fedin.

¹³ Maaī bun gare den anidi, maaim ifenēdi di, laa ado Hades, gare de di, idi bun difaren anidi difenēdin. Age fe di, mugu mugu ereb age difen kilei, es fedin.

¹⁴ Age fe di, laa ado Hades, ku kolili fiya yā bobo reya ado bun geif iraran. Ku kolili fiya yā bobo reya ado, are laa uyulil isin anī dō fiya laa anī.

¹⁵ Aib taka ī, yogan yana mata ibodōya nē buk bun itotoya sā ilen, ī ku kolili fiya yā bobo reya ado bun, yale iran.

21

Jerusalem Mata

¹ Anī bure fele di, aya, saa mata ado teneub mata, ailen. Saa uyulil ado teneub uyulil are waïf yalen, agef fen, maaī baban to ibodon.

² Aya Taun Fateul, are Jerusalem mata, Negur bun tamal, saa ilunem isi mog, ailen, are kayau mois tamon iley a nigin naki rel fen, dodok fen gen.

3 Age afe fen, aya ait odug king nē sia bunem eig ye mog, karī aun, “Gama Negur nē salafat, tamo bun ibodok, age fe di, ī idi geid dibodōf. Idi yogon tamo kayau ouf, age fe di, Negur yogo bagai, idi geid dibod ken, idi neid Negur ibodōf.

4 ī idi neid meleid bun maruid ganan waī falauf. Baban laa, wau gudū fiya, inā yaleya be, darau to ibodōf, ere nigin, ereb ereb tubu nē are, ganan sa kelen.”

5 ī king nē sia bun ibodon are iron, “Aya ereb ereb ganan mata anof!” Age ye fen, ī iron, “Enei utot, ere nigin, od eneidi are, agef bagai wō youf nigin momoi bagai.”

6 ī aya irokanan, “Gama mogo bure felen. Aya uyulil ado idikeleya, gariya ado idikeleya. Taka ī naan ail fouf, aya ī mata ifenēya nē naan warur bun tamal, mala sā, afenē di, yāf.

7 Taka ī kusī wal fouf, ī enei ganan akorouf, age fe di, aya yogon Negure di, ī neu kesu ibodōf.

8 Anī ere, idi dume dume age difedig, momoiya sā, toboununā sane bagai dinodig, tamo dukesidig, noli toboununā dinodig, idegēya bun kosē dedig, idegēya waitou yana dalesedig ado, idegēya tamo ganan, idi neid modoū are, ku kolili fiya meein salfa yā bobo reya barikā ado bun. Enei are, laa uyulil dō fiya namba tu laa anī.”

9 Engel sewen anī taka, beī sewen idikeleya nē sesen barikā teneub daū fiya nē ado anī taka, isi fen, aya irokanan, “Usi, aya kayau mois, Sipsip Naal nē kayau anī afelnōf.”

10 Age ye fen, ī aya Awa Uur bunem arei odug ilun bagai anī bun irouleya fen, Taun Fateul,

Jerusalem, Negur bun tamal saa ilunem isi mog, ifelnan.

¹¹ Taun are, Negur nē fula fiya medeīya anim so fen. Yogan medeīya are, meein na sur fiya nē meli bagai jaspa gen, yogan filiya are, galas medeīya bagai gen.

¹² Taun are, yogan garaī odug ilun fen, bobog tuwelf ado. Agef fen, engel tuwelf bobog bun difaren. Bobog bun, Israel ibor tuwelf anidi yeneid itoton.

¹³ Bobog towo gaa iseyan, bobog towo not melē, bobog towo saut melē, bobog towo gaa ileyan age de difaren.

¹⁴ Taun anī nē garaī, gariya tuwelf ado, gariya tuwelf anī bun, Sipsip Naal nē aposel tuwelf yeneid ado.

¹⁵ Engel aya wogō fiyan are, ī taun, taun nē bobog ado, yogan garaī sisi fediyouf nigin, sisi fiya nē gol tibog iroun.

¹⁶ Taun nē bagalam ado bogorou kilei kilei inon. Engel are tibog nem taun sisi fe fen, ilen, 2,200 kilomita meluk, yogan bagalam ado yogan ilun areg de anī kilei.

¹⁷ Engel ī, tamo nē sisi fiya bunem, taun garaī nē mugi sisi fen, are 65 mita, areg engel nē sisi fiya.

¹⁸ Garaī are, meein jaspa nem inon. Agef fen, taun are gol bagai nem dogol inon, gol filiya are galas medeīya bagai gen.

¹⁹ Taun garaī nē gariya are, meein meli bagai fire fire nem, naki fen. Gariya uyulil ifaren are jaspa nem, anī dō fiya are meein maaī gegē gen sapαιa nem, anī dō fiya are meein kalsedoni nem,

anī dō fiya are meein aarau mata gen emeral nem,

²⁰ anī dō fiya are meein giriya ado lalau sadonikis nem, anī dō fiya are meein giriya konilian nem, anī dō fiya are meein aarau mayo gen krisolait nem, anī dō fiya are meein aarau mata gen beril nem, anī dō fiya are meein aarau mayo gen topas nem, anī dō fiya are meein krispres nem, anī dō fiya are meein haasin nem, anī dō fiya are meein giriya ametis nem.

²¹ Bobog tuwelf are maaī tuwa meli bagai pel tuwelf, bobog teke tekelei, maaī tuwa meli bagai pel teke tekelei nem inon. Taun nē naab odug are, galas karētut bagai gen, gol bagai nem dogol inon.

²² Aya taun an tempel taka to ailén, ere nigin, Odug Negur saa ilun nē kusī tamo guri feid uyu iroudig anī ado Sipsip Naal are, idi anī tempel.

²³ Taun are, gaa lalan be, ogō lalan yaleya nigin to yenek, ere nigin, Negur nē fula fiya medeīya anim lalan ifenēdig, agef fen, Sipsip Naal are taun nē lam.

²⁴ Tenebur tamo kayau, taun anī nē lalan bun diyō di, tenebur nē king, nedī fula fiya medeīya, taun anī bun dirousiyouf.

²⁵ Naa taka bun, yogon bobog taka to bagai inolalauf, ere nigin, an bō sāf.

²⁶ Tenebur tamo kayau idi, nedī fula fiya medeīya ado yana odug, taun anī bun dirou disiyouf.

²⁷ Ereb taka amuyē ado an namen to ilauf, agef fen, aib taka mama nē tobounā age fedig be, idegēdig, īg an to ilauf, anī ere, idi yeneid Sipsip

Naal nē mata ibodōya nē buk bun itoton anidi dogol dilauf.

22

Mata Ifenēya Nē Naan Odug

¹ Anī bure fele di, engel ī, aya, naan odug, mata ifenēya nē naan, are karētut galas medeīya bagai gen, Negur nē ado Sipsip Naal nē king nē sia bunem isif anī ifelnan,

² naan are taun nē naab odug atu isilen. Naan si sitakā, mata ifenēya nē aa difaren, are yar tekelei bun faat yū tuwelf fedig, ogō teke tekelei bun yogon faat yūdig. Agef fen, aa aarau are, tenebur tamo kayau dagi yalelkenēdiya nē.

³ Isisīya taka baban to ibodōf. Negur nē ado Sipsip Naal nē king nē sia are, taun namen ibodōf, age fe di, yogon ferfer idи, in aruna dalouf.

⁴ Idi in nawa dilouf, age dife di, yogon yana idi demeid bun ibodōf.

⁵ Baban bō taka to ibodōf. Idi lam nē lalan be, gaa nē lalan nigin, to kisi difouf, ere nigin, Odug Negur idi lalan ifenēdiyouf. Age fe di, idi gai gai lo fiya nigin mudur dibodōf.

⁶ Engel ī aya irokanan, “Od eneidi are, agef bagai wō youf nigin momoi bagai. Odug, profet neid uur nē Negur, ī ereb mogo wō youf bagai anī yogon ferfer ifelnēdiyouf nigin, yogon engel sur fen.”

Jesus Mogo Isif

⁷ “Ulef! Aya mogo kaisā bagai asiyou fenē! Taka ī profet od buk enei bun ibodok anī dōfef are, ī el fiyek.”

⁸ Aya, Jon, ayam eneidi karī au fen, ailedin. Sain aya anī karī au fen, ailedin, aya engel aya ifelnan anī, ye gariyan kubū au fen, yana alesauf nigin age afen.

⁹ Anī ere, ī aya irokanan, “To ago! Aya, õ, ogon turā tar profet ado, idi buk enei nē od dō difef anidi ganan geid, ada in ferfer. Negur yana wales!”

¹⁰ Age ye fen, ī aya irokanan, “Õ buk enei nē profet od anī bun, ītāfiya uris to uno, ere nigin, sain mogo melsak.

¹¹ Aib ī mosor inof, utornēg len, ī agef mosorei youf. Aib ī sane age fef, utornēg len, ī sane agei fouf. Aib ī biya age fef, utornēg len, ī biya agei fouf. Aib ī fateul ibodok, utornēg len, ī fateulei youf.”

¹² Jesus irok, “Ulef! Aya mogo kaisā bagai asiyou fenē! Mala solo tamо ifenēdiya nē are yeir, aya bun ibodok, anī nigin, aya, tamо mugу mugу ereb age difen kilei anī afenēdiyouf.

¹³ Aya uyulil ado idikeleya, uyulil nē ado dumen bagai nē, gariya ado idikeleya.

¹⁴ “Idi dogo neid kolos meluk kulo difef, anī bunem, idi mata ifenēya nē aa bun ileyя nigin ado, taun nē bobog bunem taun namen ileyя nigin kisi feleya, are idi el fedif.

¹⁵ Mayarē difaref are, idi gaū, idi idegēya bunem kosē dedig, noli tobонunā dinodig, tamо dukesidig, idegēya waitou yana dalesedig ado, idi ganan idegēya nigin waud laaf fen, age difedig anidi.

¹⁶ “Aya, Jesus, ayam kurō fesiya od enei sios nigin afeneif nigin, ã bun neu engel sur afen. Aya

Dawid nē Warumutei ado Ibor, Bonimei nē Barisa medeīya.”

¹⁷ Awa Uur ado kayau mois dirok, “Usi!” Aib taka ī karī yef, irōf, “Usi!” Aib taka ī naan ail fef, utornēg len, ī isiyouf. Aib taka ī orof, utornēg len, ī mata ifenēya nē naan ege luwa yalouf.

¹⁸ Aya, idi ganan buk enei nē profet od karī def anī, totol bagai arokenēdif: Aibem taka od enei teten erek taka tobol fouf, Negur ī daū fiya nē sesen buk enei bun itoton anī, ī bun tobol fouf.

¹⁹ Agef fen, aib taka profet od nē buk enei bun od taka yalelauf, Negur ī, mata ifenēya nē aa ado taun fateul, buk enei bun faded fel itoton anidi bun tamal, ī yalelnēf.

²⁰ Taka ī enei ganan kurō fesif, are irok, “Momoi, aya mogo kaisā bagai asiyou fenē.”

Momoi. Odug Jesus usi.

²¹ Odug Jesus nē wau ifenēya, Negur nē tamo kayau bun ibodōf. Momoi.

**Mata Ifenēya Nē Od
The New Testament in the Marik Language of Papua
New Guinea
Nupela Testamen long tokples Marik**

copyright © 2011 Wycliffe Bible Translators, Inc.

Language: Marik

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 0868934534

The New Testament

in Marik

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-07-22

PDF generated using Haiola and XeLaTeX on 18 Mar 2025 from source files
dated 31 Aug 2023

d7099f9d-3bdf-5620-8eb3-7e6c51cab7ea